

謝林 徐太平 楊居讓 主編

陝西省圖書館藏 稀見方志叢刊

北京圖書館出版社

陝西
省
圖
書
館
藏

謝林 徐大平 楊居讓 主編

稀
見
方
志
叢
刊

15

北京圖書館出版社

第十五冊目錄

〔光緒〕佛坪廳鄉土志不分卷	一
〔光緒〕留壩鄉土志不分卷	四一
洋縣鄉土志一卷	二五七
西鄉縣鄉土志不分卷	三八一
〔康熙〕漢陰縣志六卷之卷首至卷三	五五三

鄉土志目錄

歷史

政績

兵事

耆舊

人類

戶口

民族

宗教 實業 地理 山 水 道路 物產 商務

歷史

佛坪舊名佛爺坪未設廳治以前概稱為盤屋山內地方遼濶山谷阻深與甯陝岐郿諸山皆相毗連林深箐密實人跡罕到之區開闢亦最晚嘉慶間設盤洋縣丞於袁家莊轄佛坪道光五年廢縣丞又益以盤洋二縣之地改為廳治習俗樸陋文獻缺如四境之內既無碑碣可資考證而散見於載籍者又復畧而不詳至鄉先生所傳述尤荒渺不足據第就其疆

域考之在唐虞三代時地當雍梁二州之交秦漢時
屬右扶風及漢中郡三國以後屬扶風郡及梁州至
唐屬稷陽二州宋屬京兆興元二州元屬奉元興元
二路明屬西安漢中二府 國初因之此歷代沿革
之大略也既設廳治以後無所更改

政績錄

景梁曾浙江人道光五年升任時廳治初設諸事缺
如築城垣建衙署招集客民開墾荒山區畫備極精

詳人皆樂於服役易曰說以先民民忘其勞梁曾有焉

朱念祖江蘇寶應蔭生道光二十六年署任修文廟建橋梁設義學民到於今稱之

李夢愚山東博興進士道光二十八年升任剛毅明決案無留牘民敬畏之創立書院設學校以培植士子年七十卒於官民奉祀書院以誌感慕

孫柅山東濟甯監生成豐七年任性耿介不苟取與

公餘輒至書院與生童誦學終日不倦

樊繼英湖北隨州監生同治三年署任時值寇亂繼英帶團勦防不遺餘力卒至元惡授首民賴以安
劉寶年甘肅武威貢生光緒三年署任時值荒旱多方賑濟救活災黎無算

兵事錄

佛坪為形勝之地山徑盤屈隨在皆可設險祇以居民散處不能聯絡一氣以致外匪竄入被害者屢矣

嘉慶十八年岐郿匪竄擾本境厚畛子漢中鎮總兵吳廷剛帶兵追剿遇賊於袁家莊滅之未幾川匪王三槐竄本境漢中鎮總兵楊遇春滅之同治元年九月川匪藍大順犯本境陷廳城民團防剿死難者三百餘人被擄者二千餘人受禍最烈賊又分股犯東鄉攻破袁家莊寨擄殺無算時雪深數尺任其飽掠而去二年九月藍逆復來犯襲取廳城留賊屯駐自率大股出山陷盤縣城多忠勇公圍攻半年而渠

魁始就殲三年正月川匪曾丕時由寶雞厥羊坡擾
及本境黃栢塬遂東掠廳城又東掠袁家莊入盤厘
潞浴河一帶漢中鎮總兵蕭慶高帶兵跟追至本境
馬宗灘擒之蓋堅壁清野之法行之山中成效尤易
著令居民習火器築堡寨據險而守再佐以兵力游
擊堵截賊既入險而又無所得食未有不撲滅者

耆舊錄

本境之碩得德通儒凡在道光以前者既不可考證自

設廳治以來其行誼可法著述可傳者又不少概見
謹就時論所稱有孝廉方正陳鴻恩鹽知事銜鄭鳴
岐從九品銜紀章鳳汪玉成皆不惜重資倡修本處
文廟書院其急公好義有足多者

又有鄉民丁志渭於同治元年被藍逆所執欲降之
志渭不屈罵賊而死時年已八十有古烈士風

又鄉民程普沾好義識大體捐地入迎秀書院以助
膏火時設廳未久山民椎魯不事詩書至是始有徇

學之士

人類

本境之人皆由四川湖北山西及紫陽洋縣遷來置
有田產便成土著其外來流民之入山者扶老携幼
百十成羣夜宿樹林中取石支鍋拾柴作飯遇有招
主給地開墾借粮作種則伐木支椽上覆茅草或木
板僅蔽風雨有收即典地築屋無收即遷徙他處號
曰棚民

廳治東沙窩子有苗民李吳熊馬王陳六姓每姓二
三戶及七八戶不等係道光二十三年由貴州遵義
府遷來善藥弩謂之武侯遺法發無不中然性極古
樸男女躬耕自食其力從無爭競事張金鑑竹枝詞
曰苗民還是好良民信然

戶口

查舊冊東南路袁家莊西岔河陳家壩葯壩東河口
等處共居民七千餘家西北路都督河上郎壩厚畛

子八斗河板房子等處共居民三千餘家男大小四萬七千二百丁女大小三萬三千三百七十八口自光緒初年山中多雨洋芋潰爛加以山地耕久利薄山民又不諳糞田之法以致連年歉收前由山外遷移而來者又復轉徙而去現存不過四千二百戶男大小一萬八千丁女大小一萬零五十口

民族

境內老業戶不敵客戶之半開闢伊始業戶本自稀

少加以山民賦性頽惰不善經營而生聚因以不繁
至外來客民多佃地為生其來去不常者無論矣即
有久居於此置買田產者因山田無多食指衆則又
散歸原籍故聚族而居者少本境族大者共有八姓
問其受氏之初已數典忘之矣史氏康熙間由洋縣
遷居本境至今傳八代程氏乾隆間由安徽遷居本
境至今傳八代田氏嘉慶間由湖北黃岡遷居本境
至今傳七代李氏嘉慶間由湖北黃岡遷居本境至

今傳五代劉氏嘉慶間由江南潛山遷居本境至今
傳五代宋氏嘉慶間由洋縣遷居本境至今傳六代
金氏道光間由湖北黃岡遷居本境至今傳六代陳
氏道光間由四川遷居本境至今傳五代

宗教

回教人查得無

喇嘛教人查得無

天主教人查得無